

## **ASO FARAILE, 26 IANUARI 2024**

*Na nofoia e le Fofoga Fetalai le Nofoa i le itula e 9:33 i le taeao.*

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

Ua tatou i ai i le toe aso o le tatou galuega o lenei vaiaso. E le uma lava le loto faafetai ma le faamanu a'e i le lagi ona o le alofa ma le agalelei o lo tatou Atua, ua maua ai so outou finagalo ma se manatu e avagalimaina ai lo tatou valaauina. Ou te faatalofa atu ai i le tulaga aloaia i le paia maualuga o le Palemene i lenei taeao fou, i le afio o lau Afioga i le Taitai o le Malo, le Afioga i le Tamaitai Palemia. Afio lau Afioga i le Sui Palemia ma le paia o le Kapeneta, afifio foi a outou Afioga i Mnisita Lagolago.

E faapea foi i lea itu o le Maota i le afio o lau Afioga i le Taitai o le Itu Agai, lau Afioga i le Sui Taitai aemaise sui usufono mamalu uma o le Palemene. Malo le soifua manuia ma le lagi e mama. Faafetai i le Atua ua tatou toe fesilafai i lona filemu i lenei taeao fou.

E faatalofa atu foi i le paia o le tapuaiga a Ofisa Sili Pulega o Matagaluega, Faalapotopotoga Tumaoti a le tatou Malo aemaise o nisi o le mamalu o le atunuu ua tatou faatasi i lenei taeao. Malo le soifua manuia.

Le faafofoga tapuai mai a le atunuu i ona tulaga faalagia, e faatalofa atu lau Palemene i lenei taeao. Tau ina ia i ai pea le alofa o le Atua i le alofaiva o le tatou atunuu i feau ma tiute faagasolo o lenei aso.

O le faaauuina o le tatou galuega i lenei aso, o le tatalo lava a le Fofoga Fetalai ia agalelei le Alii ia faamalamalama e Lona Agaga le ala o le a tatou savavali ai lenei aso ina ia malutia lo tatou valaauina, ma ia to manu aua se ai o le tapuaiga a Samoa o lo o faatalitali mai. Ia faia pea e Ia se loto fou mo i tatou ia faafouina foi e Ia se lotomau i totonu ia i tatou. Alofagia e le Atua le usugafono a le Palemene i lenei taeao, ia i ai foi Lona agalelei i le tapuaiga a le atunuu.

### **TULAFONO TAU FAAOFI O LE FAATATAUINA O TUPE FAAOPOPO (NU.1) 2023/2024 - felafolafoaiga faaauu i luga o le faitauga faalua – Aso 4**

**FOFOGA FETALAI:** E tolopo felafolafoaiga i le aso fono ananafi ua maea saunoa le Sui Taitai o le Itu Agai. E i ai foi le manatu o lea ua... sa tuu atu lava avanoa i le tatou Maota i nisi e fia saunoa ae peitai i le maitau foi ale Nofoa i le aso ananafi e pei ua le o i ai nisi. O le ala lea ua tulai mai ai le Sui Taitai. Ia, o le avanoa foi lenei lea ua faamoemoe e tuu atu i le Taitai o le Itu Agai ona

tuuina atu loa lea i le Taitaifono o le tatou Komiti ona tuuina atu loa lea i le tatou Malo.

**Tofa SEUAMULI FASI TOMA (Gagaemauga 2):** Lau Afioga i le Fofoga Fetalai...

**FOFOGA FETALAI:** E talu ai ona e tasi lenei sui usufono o le tatou Maota sa toesea ona o nisi o fuafuaga, o lea ua maua lou avanoa e toe tuu atu se i faaleo foi sou finagalo.

O le avanoa lenei o lau Afioga i le sui usufono mamalu mai Gagaemauga 2. O lou avanoa lenei.

**Tofa SEUAMULI FASI TOMA:** Faafetai. Ia malie ia i lou loto upu ma mafaufauga o lo'u loto le Alii e, o lo'u papa ma lou faaolataga na te togiolaina au.

Ou te muai faatalofa atu i lau Afioga i le Fofoga Fetalai, e faatalofa atu foi i lau Afioga i le Tamaitai Palemia, le Afioga i le Sui Palemia ma le mamalu o le Kapeneta.

E faafeiloai atu ma faatalofa atu i lau Afioga i le Taitai o le Itu Agai aemaise foi o le Sui Taitai ma lena itu o le Maota. E faatalofa atu foi i lau Afioga i le Sui Fofoga Fetalai aemaise o Afioga i Minisita Lagolago ma lenei foi itu o le vai.

E faatalofa atu i Ofisa Sili o Pulega o Matagaluega aemaise o Faalapotopotoga Tumaoti a le tatou Malo aemaise foi lau Susuga i le Failautusi ma le Ofisa o le Fono Aoao aua foi lenei taeao fou.

O paia o Samoa o le a taalolo, pe oo i ai se leo pe le oo i ai se upu a lenei itumalo e le mafai ona toesea pe faaopoopo ai se iota, o paia o Samoa e tumau e oo lava i le faavavau. E faatalofa atu foi i Taitai o Ekalesia aemaise foi o le aufaigaluega o le Talalelei i so o se tovine o lo o faanonomanu aua se manuia o le tatou atunuu.

E faatalofa atu foi i le tapuaiga a nai o tatou motu i Sasae, faigamalo a Maota e Lua aemaise foi o le mamalu o le faigamalo a Tutuila ma Manua.

E le vaea foi le falaooto i le faatalofa aloaia i si ou Itumalo i le amataga foi o lenei tausaga, Gagaemauga 2 i le amata atu lava i Fanuatanu ma Mutiatele ma Matautu, Siliga ma Falefaamaoi ma Faletoalepai, Falefagamalo o Avaio, aemaise foi o Maloamata ma Pugale i lenei foi amataga o le tausaga. Malo le soifua malo foi le galulue. Ia tapuai maia se i taumafai se leo o le tatou itumalo aua foi le Tala Faatatau Faaopoopo o le Tupe ua taoto nei i lumamea i le Laulau-a-Fono a le Palemene.

Lau Afioga i le Fofoga Fetalai e amata atu sina faamatalaga a lenei Itumalo i lau Afioga i le Minisita o Galuega. I lau lava molimau i lau Afioga i le Minisita talu ona tulai mai ma tofia e avea ma Minisita o Galuega ma nisi o Faalapotopotoga a le Malo, ua molimauina lava le toe faafouina o lou malosi e pei o le aeto. E mafua i se a? O le tatalo faifaatasi a le atunuu, aua e leai lava se isi o le atunuu e le tietie i se taavale ma fealuai i le auala. E leai foi se isi o le atunuu e le mafai ona tietie i le vaa, o le vaalele, e taumafa le suavai, e ola i le

eletise. O le ala lea o le tatalo faifaatasi o le atunuu aua le soifua o a outou Afioga i Minisita aemaise foi o le Taitai o le Malo.

I le aso fiasia lea na faatoa uma atu nei, talu ona ou fealuai i le va o motu ia e lua ia o Upolu ma Savaii faatoa ou tau lea i se tumu ma se pisi ua le tusa ai, le va lea o Mulifanua ma Salelologa. Ae momoli atu le agaga faafetai i lau Afioga i le Minisita aemaise foi o le Pulega a le Kamupani Vaa. E faaleo foi le agaga faafetai i le Kapeteni ma alii ma tamaitai seila e tusa ai ma le latou galuega le faalogologotiga. E o ese ma aiga ua pogisa ae toe foi i aiga ua pogisa i le tautuaina o le atunuu.

O le mea lea e momoli atu ai le agaga faafetai i lau Afioga i le Minisita e tusa ai ma le soifua tautua, o Faalapotopotoga o vaa a le atunuu aemaise foi o le tulaga i le Pulega o Uafu. Malo le galulue. O le tatou uafu i Mulifanua lea foi ua molimauiina i Salelologa, malo faafetai. Leaga o le fatu lea o le faamoemoe o le faigamalo, o le ola soifua maloloina o le atunuu aua a mama le siosiomaga, ua ola soifua maloloina Samoa ma ona tagata. O le mea lea e momoli atu ai le agaga faafetai tele lava.

O nai vaega e tau foi ma lau afioga e faafofoga i le tuitui atu a lou sui usufono e tusa ai ma le faamoemoe e pei ona i ai. O le patupatu lea i luma o le Falesa lea VOC i Saleia, e molimauiina lava i le faaiuga o le tausaga le o a taavale a o le leotetele foi o tigipalau o sauniga lotu. Lau Afioga i le Minisita, ou te le manao e tupu le faalavelave ona faatoa tagofia lea, ae lelei lava le tupu ae a o la ua i ai le fofo o le faafitauli.

O lea foi ua aveatu lau talosaga afai e finagalo i ai le Pulega o le Laueleele e mafai lava ona fai e le Fono Faavae, nai taga sima ma nai mesh wire pe afai e finagalo i ai lau Afioga i le Minisita. O le auala lea i le alu i uta i Vaipouli o lo o taoto ai le aoga lea a le Kolisi a le Itu o Tane, le aoga tulagalua a laumoli aemaise foi o le falemai. Ua silia nei ma le tausaga na o atu ai le konekarate sua vaeatu le paia o le Maota ma le faafofoga a Samoa. Ua sua, sua ona omai lea nofonofo ae le o atu e toe fai faalelei le auala, ua matua tele le faaletonu o le auala. A o le iuleo lea a lea, le tatou Malo, o le Malo. E fai e le konekarate ae tau ai fua le Malo. A o le fesili, o ai le Malo? O lau Afioga i le Minisita vaeatu lava le Taitai o le Malo ma le Aiga Kapeneta ona o au ou te weekend i vaiaso uma, vaiaso uma ou te i ai i Savaii. O le ala lea lau Afioga i le Minisita, taatia atu pea i ou tafatafa.

Ua uma ona ta talanoa i le vaega foi lea o le auala sa i ai le faaiuga a le Kapeneta, FK i le aso 12 Fepuari 2020. Ua faailagi le foi sa taitaia le Matagaluega i lena vaitau, a o lena faaiuga e le i mafai ona faataunuuina uma. O lea la lau Afioga i le Minisita pe toe tasi lava se kilomita la e totoe. Ae ou te le o mailoa foi po o le a le mafuaaga na ala ai ona le soo le auala lea. Ia, na ona faataoto atu lava faapena i lau Afioga i le... o le auala lea e i gauta o matou a o le faamoemoe autu lava ia o le faaiuga e alu atu le auala i Satoalepai taamilo manu ane i talaane o le Lagoto. O le sao lena o le poloketi lea. Ae peitai ane ua le mafai ona faataunuu. O le mea lea lau Afioga i le Minisita sei silasila ai i lea autafa.

O le vaa lea e taunuu mai le va o Tutuila ma tatou i nei i Upolu, ia se i silasila i ai i le taimi lea e taunuu mai ai aemaise a le taimi lea o aso fiasia, e taunuu

mai le po, ao. ae o le isi loa aso le tausaga fou po o le kerisimasi, mo le tulitamoe aemaise lava mo matou i Savaii. O le a le mea e le se i silasila ane ai, a taunuu mai loa tiute loa. E le gata i le Pulega o Uafu, Pulega a le Kamupani Vaa aemaise foi o le vaega lea a le Custom po o le tupe maua. Lau Afioga i le Sui Palemia, na ona taunuu mai lava tiute, malaga tagata i Savaii a o la e tele le avanoa. Na ona faaleo atu faapena o finagalo, o iuleo o le atunuu o lo o faapea ona oo mai lea e taumafai atu ai sina faamatalaga ma le faaaloalo.

O le Minisita o Falemai, leaga o lea e le o lava mai le Afioga i le Minisita o Falemai. Faafetai tele lava i le Falemai lea i Safotu aemaise foi le Falemai lea i Vaipouli. O le faaiuga o le tausaga na ou alu ai e asi nai nisi foi o tamalii o le matou nuu sa taotoo i le Falemai lea i Safotu e toalua. Ou tau atu o lo o taotoo ai ma nisi o gasegase o nisi o tama o le itumalo, e le gata i le Gagaifo ae faapea foi matou i le Gaga'e. O le itu e momoli ai lau faafetai, o nei tama uma ua faailagi uma le folauga, e leai se isi o soifua, ua maliliu uma nai toeaiina. E le na ma le laina afai foi o faafofoga mai le Ofisa Sili o Pulega o le Matagaluega o le Soifua Maloloina, o le matou fomai o se tagata atamai, e agavaa ma e tele foi lona silafia, a o le tino ua le mafai ona toe faatino se galuega, leaga afai e avatu le mai lea i i le falemai, ia e leai se Fomai (Doctor) na o teine.

E mamao tua vaeatu lava le paia o le Maota o lo o faapea ona tali ai le sua a le Palemene. E nofo mai i ina le fomai, ona vili atu lea o le teine lea e i i i le fomai, ona vili mai lea o le fomai la e i o e tau mai le togafitiga e fai i le mai. A o le mea e maualuga, e tatau lava ona oo mai le fomai se i tago i le lima o le mai, tago i le ulu o le mai, pe tag oi le manava o le mai vaeatu le paia o le Palemene. Pe oo mai lava le valaau a le Atua a o la e malie le loto. A o le mea lea o le telefoni mai o i le pausisi vaeatu le faafofogaaga a Samoa, ua leva tele ona ou tatalo atu i le tafa lea. Ia, o le iuleo o lou itumalo aemaise o tatou itumalo. E 5 sui usufono lea e faaoga le falemai lea e i Safotu, o Gagaemauga 1, 2, Gagaifomauga 1, 2, 3. A o lea lava e taumafai atu se agaga, a faafofoga mai foi lau Afioga i le Taitai o le Malo, o nai atugaluga aua foi le soifua maloloina o nei itumalo e 5 o le Gagaa'e, aemaise foi o le Gagaifo. A o le soifua tautua o le Matagaluega i aso fiafia, ia malo galulue i alii ma tamaitai fomai, aua foi le soifua maloloina o le atunuu.

Lau Afioga i le Minisita o le Siosiomaga, ia e le na ma le laina, e lava lou silafia i le siosiomaga o lenei itumalo. Ia, o le taligalu. O le tai oooo lea na i ai le vaiaso talu ai, tele tele le aafiaga aemaise lava le faasolo atu i le mea sa i ai le falemai tuai i Fagamalo faasolo atu ai i Lelepa. O Avao e faafesagai ma le maota o le Tausimatagaluega Metotisi, toeitiiti lava oo i ai le sua o le tai i le taimi lea na leaga ai le tau ma siisii le tai. Ia, lau Afioga i le Minisita o le Siosiomaga, ia po o lau Afioga lea o lo o fitoitonu ma lea vaega, e mafai ona lau fua le maa, pau lava lea o le mea o masini, ae o lo o maua fua le maa, teu fanua o aiga ma lau ae le maa aua foi lea atinae. Ae na o nai masini lava e faatino ai le tulaga o le galuega.

Ia, e le tele se Tala o se Tupe. O le vaega lea o le Faalapotopotoga o Taaloga po o petipetiga. O le taaloga lea o le bingo, e talosaga atu e a pe a se i tau faafaigofie ona faafou laisene. I lau lava tilotilo vaeatu le Afioga i le Fofoga Fetalai ma le paia o lenei Palemene, o le mea ia e ese le faigofie, se ae nonofo

lava tatou ia ma faafaigata e tatou tatou. E tilotilo lava i le tulaga o le faafouina o nei laisene e tapa lea mea, tapa atu lea mea, tapa atu lea mea. A o le mea sa i ai i aso lava ia i le amataga, e leai lava ni mea tele, na o le pau lava le mea o le faafou totogi le tupe aumai le lisiti, faataavale le taaloga a le aulotu ia.

O le isi itu e tilotilo i ai, o le tulaga i faailoga...

**Tofa Hon Leatinuu Wayne Sooiolo (Minisita mo Faalapotopotoga Tumaoti a le Malo):** Lau Afioga i le Fofoga Fetalai...

**FOFOGA FETALAI:** Ia malie le sui usufono mamalu se i tuu atu le avanoa i le Afioga i le Minisita o Faalapotopotoga a le tatou Malo. Lau Afioga i le Minisita.

**Tofa Hon Leatinuu Wayne Sooiolo:** E lelei pea le ao pea ona faamalamalama o le mataupu ne ite e i ua taitaiseseina ai le mamalu foi o le atunuu aemaise foi i latou o lo o fai a latou taaloga nei o le bingo. O lo o i ai le tatou faiga faavae o lo o i ai foi le tatou Tulafono ua uma ona faataatia ai mo aiaiga o le taaloga lenei. Ae a faapea loa tatou te faia e alu faasoloatoa faapea, ia o lona uiga ua tatou le usitaia foi laia o le Tulafono na ala ai ona fausia a tatou petipetiga. Ae onosai, e faigofie aua e le o ni taaloga tetele e maua ai ni tupe tai miliona. A lelei lava le lipoti mai ma aumai totonu o le Matagaluega, e vave foi ona alu atu. Ae a faapea e fai ae na ona faaaoaga o tupe ma faatino le tulaga o taaloga ae le lipotia mai e le Matagaluega, o le faigata ia i le Matagaluega ona faatino ana... leaga e leai se Tulafono faapena e faatino ai. Atonu o aso la e le i i ai se Tulafono, o aso foi na e le i faia ni pemitā, e le i faia ni laisene ma tulaga faapena, ae malilie tatou usitaia pea le mea ua i ai i lenei vaitaimi aua foi le faamaopoopoina. Ae faigofie lava pe a vave foi ona aumai Tala o le Tupe e faatino ai fuafuaga ia. Ia ma le faaaloalo lava faafetai.

**FOFOGA FETALAI:** Ia, ua manino le saunoaga a le Afioga i le Minisita. Se i tulai mai le sui usufono mamalu e faaauau le saunoaga.

**Tofa SEUAMULI FASI TOMA:** Faafetai lava i le Afioga i le Minisita e tusa ai ma le faamaninoga o lea tafa.

O tulaga i mea ia o faailoga, ia o lea foi pei ona saunoa le Minisita ua limataitaiina e le Tulafono. Ua limiti mai foi e le Tulafono le malo, le malo o le faailoga lea o le taaloga. Ae a silasila i le malo o le faailoga lea o le lulu, e le o i ai se Tulafono e faatapulaa ai malo o lulu. O isi lulu ua malo i le kuata eka, o isi lulu ua ma lo i le afa eka, o isi malo o isi lulu e \$10,000, \$5,000, \$20,000. Pe le alagatatau ona tuufaasaoloto foi faapena ma mea ia o faailoga o taaloga bingo.

Ia e pei o se tulaga lea lau Afioga i le Minisita, e leai, e sao lelei lava. O le Tulafono lava ia o le Tulafono e limataitaiina ai le faagasologa o taaloga a le tatou Malo aua foi nisi o seleni maua. Ia, e pei o vaega ia e pei ona momoli atu, a o le tulaga i le faamoemoe o lenei itumalo, ia, se ana ua alu atu i tua le isi

miliona e leai lava se umi o nisi talosaga, o la e ua faatali mai le tapenaga aua foi tulaga e pei ona i ai atinae a le tatou Malo.

Ia, e pau ia o nai vaega e oo i ai se leo o lenei itumalo aua foi le gasologa e pei ona i ai aua foi le Tala Faatatau Faaopoopo o le Tupe o lo o talanoaina nei e lenei Palemene.

Ia, alofagia e le Atua lau Afioga i le Fofoga Fetalai, maua pea lau tofa, aemaise foi ia toa pea lou finagalo, e le gat ai ou tiute faaleaiga, o le Taitai o le Maota, aemaise foi o lou valaauina faale-Talalelei.

Ia manuia le paia o lenei Palemene, ae ola pea le sui usufono o le Gagaemauga i le alofa o le Atua. Faafetai.

**FOFOGA FETALAI:** Faafetai. Malo saunoa i lau Afioga i le sui usufono mamalu. Atonu o lea ua faafofoga atu ma le toto'a le tatou Malo ma le Maota, malo foi le faaso, aemaise foi o nai vaega e ao foi ona silasila i ai aua le manuia lautele o nai o tatou tagata. Malo lava saunoa. Faafetai.

Oi, ia leaga sa malaga faatasi lava sui usufono ia i Tutuila. O le ala lea o lea o le a toe tuu atu ai le avanoa i lau Afioga i le sui usufono mamalu mai le Vaa o Fonoti. Lou avanoa lenei.

**Tofa MAUU SIAOSI PUEPUEMAI (Vaa o Fonoti):** Faafetai i lau Afioga i le Fofoga o le Fono, aemaise foi ua maua se avanoa e faaopoopo e folasia ai foi ni mafaufauga e tusa ai foi o le Tala Faatatau Faaopoopo o le Tupe e pei ona taoto nei i le Maota Fono.

Ona i ai lea o le manatu o lea lava ua to'a i Utuloa le gae o peau lalaga e pei lava o le tala e fai i le Vaifagalao. Ou te talitonu foi o lea ua moli taiala lau Afioga e siitia le taulaga ma momoli lapalapa o Malo aua foi lenei taeao o lea ua usuia le Fonousu a le Palemene. Faamalo faafetai. E i ai foi le manatu o lea lava ua logo le lagi ina ia lolo'u mai Lona Mana lilo e taitoalua ai le faamoemoe, aua le soaolepule aua Samoa o lo o faafogafoga mai.

A o le i faia se manatu o lenei usugafono e tusa ai o le Tala Faaopoopo o le Tupe, e muamua lava ona ou fia pa'i i si ou itumalo o le Vaa o Fonoti ia po o le vaa e tasi foi ia Samoa ma le utulaulau. Ia le tatou itumalo, o le paia lava lea aua le afio o Ulualofaiga ma le Matua ia Talamaivao, le Toafa ma ē na Tatai, Atualefauono, Aiga e Lua ma le nofo a Usoalii ma le mamalu i le tatou itumalo i ona tulaga faalupea.

E faatalofa foi ma ofo alofa atu i le ituvai o le fuesinasina o le talalelei i totonu o le tatou itumalo. Malo tatalo, malo foi le folau. E talitonu o lea ua tatou i ai foi i galuega tau amata o lenei foi tausaga fou. Ona i ai lea o le manatu, ia tapuai maia, se i taumafai foi la outou auauna faatauavaa aua se sao, a o nisi foi o manaoga e tau ina faamanatu, aua o lo o tapuai mai lo outou mamalu.

Lau Afioga i le Fofoga Fetalai e puupuu lava, masalo foi o au le isi sui usufono e tulai loa e tasi lava le mafaufauga o Minisita, a le o le auala o le taligalu. Ae afai foi o lea le mafaufauga, sala, aua na pau lava lea o le itumalo o lea lava o lo o tumau pea manaoga. E mafua i se a? Leaga e tua i le mauga ae lumafale i le moana. Masalo o lea sa molimau le tatou atunuu i le tulaga o le mamafa o timuga ma lologa e pei ona i ai. E faamalulu i le Afioga i le Minisita aemaise

foi o le Pulega. Masalo e uma lelei lava Tesema atoa ma le lua vaiaso o Ianuari e le malolo lau valaau ona o tulaga faaletonu o lo o i ai. E ui o lea, o lea ua... le tatou itumalo o lea ua feiloai ma le Minisita ma le Matagaluega, o lea ua asia faatolu le tatou auala e oo mai le taimi nei, a o le tulaga o lo o i ai, e le mafai ona faatino lo tatou auala ona o tulaga o lo o i ai tulaga maaleale o le tau. O lona uiga, masalo o le masina fou po o se masina foi o le a to'a lelei ai ma lagilelei, ona oo atu lea o tapenaga a le LTA ona faaleleia lea o tatou auala. o le mea lea, ia maua pea lo outou onosai. O le tatou itumalo foi o le itumalo totoa, ia lava pea lo outou onosai, o lea lava ua saunoa le Afioga i le Minisita, o lea foi ua fesootai ma inisinia ma le Matagaluega, o lea o le a taumafai atu. Na pau lava lea o le faafitauli o lo o to'alia ai, ona o lea lava e le i mautu le tala o le tau. O lea lava tatou te vaaia e timu i le isi aso, e faapena foi ona faagasolo ai le vaiaso atoa. A o le tulaga e i ai, o lea ua faafogafoga mai si ou itumalo, e le o mapu lava lo outou sui usufono, e taumafai lava. A o tulaga na e pei ona faailo atu i ai.

Ona ou sosoo mai lea i le Matagaluega o le Siosiomaga...

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai...

**FOFOGA FETALAI:** Ia malie le sui usufono mamalu se i tuu atu le avanoa i le Minisita mo Galuega Tetele. Lau Afioga i le Minisita.

**Tofa Hon Olo Fiti Afoa Vaai:** Faafetai tele mo le avanoa. E faatalofa atu foi i lau Afioga i le Fofoga Fetalai, ae tainane foi le paia maualuga o lenei Maota, aemaise foi le faafogafoga i le tapuaiga a le mamalu o si o tatou atunuu.

Ae ua ou tulai atu lava se i avatu sina tamai faasaoga e tusa ai foi ma le saunoaga a le Sui Minisita po o le sui usufono. Masalo o lea e aumai lana tonu foi lea po o se plan ma te talanoa aua ou te le i saunoa i ai. A o le tulaga lava ia, o lona foi e te silafia e le i malolo, o lona e te talanoa mai ia Tesema a o lea ou te talanoa atu o Novema, amata atu ia Oketopa, Novema e le o mapu lava le auaunaga a le tatou LTA i le avatu o le fesoasoani i lou itumalo. O lea foi ua tatou maitauina e le gata foi o pasi lavevea, ae faapena foi i sologa.

Lau Afioga ou te faamalulu atu i le tulaga lona, e leai se mea e mafai ona tatou vaoia ai sologa o le itu o lo o i ai lou itumalo. A o lona foi e te silafia i le taimi lenei, po o le a lava le itupu o le vaveao e tutupu mai ai ni faafitauli, o lona lava e te silasila, e le mafai lava ona tuua le galuega fesoasoani pe ta o le 2 pe ta o le 3, ia o lona lava e agai atu le fesoasoani. Ae lau Afioga i le Fofoga Fetalai, ua aoga foi le tulai mai ma le finagalo faaalua o le Afioga i le sui usufono, o lea ua faamauina uma lava. E le gata foi i lau Afioga a o nisi o le mamalu o le Maota ma talosaga a latou itumalo.

Ae o lea ua faamaumau uma i le tulaga foi lea se i tatou oo atu i le tatou Paketi ia Iuni ona amata loa lea ona... o la e faalogologo mai lau faufautua ma lou Ofisa o la e foi e taufai faamau latou faapena foi lau Sui Minisita i le tulaga lava lea o le a ave i ai le tatou faamuamua i le tapenaga o le tatou fonotaga. E moni lava o la e ua i ai le Budget ua uma ona fai foi lea e fai ai a tatou galuega

ae i ai lava se mea foi lea o le... o se mea foi lea standby ia aua lava ne i i ai se tauvlea o le tatou atunuu i le tapenaga o le fonotaga lea.

Ou te faamalulu atu ai ne i te i foi ua toe laga ae o lea ua faamau uma lava i lalo outou finagalo ona tuu loa lea ia luni ona toe amatamata lemu ai loa lea o tatou galuega. Ae pei o le tala atu lea ne i te i ua faafofoga mai lou itumalo o lea ua uma ona ta talanoa. Ae ou te faamalulu atu ou te le iloa po o au aua ta te le i talanoa. Ae le mafai ona tuua le galuega e fia fai pea i lou itumalo ona o le tulaga faaletonu o ala e agai i ai. Ma le faaaloalo faafetai.

**FOFOGA FETALAI:** Malo faafetai.

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Fofoga Fetalai, mo se avanoa...

**FOFOGA FETALAI:** Ia, e i ai se mea... Ia, se i tulai mai le sui usufono mamalu mo Vaimauga 1.

**Afioga Sulamanaia Fetaiai Tauiliili Tuivasa:** E fia faasaoina le taimi o le sui usufono o Vaa o Fonoti. O le faafesili a Vaimauga mo le sui usufono o Vaa o Fonoti. Po o ona auala ia na toe fai i le taimi lea o le a toe fai ai le la faiga palota? Lea la sa agai loa o le a toe fai le faigapalota lea fai loa auala po o auala na lea e le i maea i le taimi lea ua e toe malo mai ai. Pei o le faafesili lena a lenei itumalo i le afioga i le sui usufono.

**FOFOGA FETALAI:** Ia lau afioga i le sui usufono mamalu, se i toe tali ifo le saunoaga a le sui usufono mamalu o Vaimauga 1 faapea foi le Minisita.

**Tofa MAUU SIAOSI PUEPUEMAI:** Faafetai i lau Afioga i le Fofoga o le Fono. Ia, e momoli atu le agaga faafetai tele i le saunoaga malamalama a le Afioga i le Minisita. Pau lava le tulaga o lo o i ai... a maua lava sina masini se tasi e tau a ia savalivali ai i le matou auala i uta. Pei o le itu a lea i uta e pei o le itu a lena o lo o fai a sina faaletonu tele. Ia, ae o le itumalo lava ia o lo o lava pea le onosai ona o tulaga o lo o i ai lea e pei ona asia foi e le LTA... o se tulaga ua faateteleina.

Ae o le tulaga e pei ona saunoa ai le sui mamalu o Vaimauga 1, o le le vaega lea o le auala masalo ua fai lava si umi o faaletonu lea na maea ona tapena. Ma o lea lava sa manino le saunoaga a le afioga i le Minisita e le i faia lava galuega ona o tulaga foi faapolikiki i lena taimi. Lea lava sa faia galuega ona o galuega lava e faasolosolo... e faapena lava faiga o mea nei o Malo. Ia lea la sa faamuamua ai le itu i tai, ia o le itu la i le agai atu i Falefa i Sauano ma Saletele. Ia lea ua pei a ole motor way le tulaga la ua i ai nei. Ao le tulaga lava ia i Fagaloa-uta, ia pei o le tulaga lena ona e pei o le aotelega o le itumalo lea o lo o ee papaaa o le itu i uta. E pei o le vaega lena lea e avatu ai foi sina talosaga, a o se faamanatu pea... o se faamanatu pea. Ia, ona o Fagaloa foi e i ai lava le mau foi le a matou i tua. E leaga loa le auala e leai lava se isi e muamua tau. E tau lava le faipule. E tau lava le faipule. E pei o le agaga foi lena. Ia, o tulaga

uma e avatu le agaga faafetai ma le agaga faamalo. Ia, e tusa ai foi... e tolu lava solo a si matou itumalo. O le ta o le 3 i le vaveao, o le 4. Lea foi sa logo mai le Matagaluega ia lea lava sa faatino.

Ia e leai se manuia o i le sui usufono ma Fagalao. Ae ou te tatalo pea i le ao ma le po e faamanuia atu i la outou auaunaga, i lo outou sao ona e le gata o Fagalao ae o Samoa atoa. Ia foi se viiga o le Atua ae le o outou.

Lau Afioga i le Fofoga Fetalai, ona ou oo mai lea i taligalu. E aiga lelei lava le taligalu ma le auala. O Fagalao, ole tulaga lea na i ai... e pei o le tulaga o le siisii o le suatai, o le tele lava o nuu ua fati i le auala i le alu i luga... Ioe, ma aafia atu ai ma le auala. Ia lau afioga i le Minisita o le Siosiomaga, faafetai lea ua faamalieina foi lou nei sui usufono e pei ona e saunoa. O le tupe muamua lava e maua mai o le a faamuamua loa taligalu o le Vaa o Fonoti pe... E o atu ma outou silasila e ese mai lava Fagalao ia Samoa atoa. O le upu moni lena, e ese mai lava Fagalao. A e taamilo i le auala taamilomilo e soo atoa lava Fagalao. Ae e te oo loa i le mafa e agavale loa ona e alu atu lea e tulai i le tumutumu o mauga ma e tatalo i le Atua pe e te au i lalo i le taele o le itumalo.

E pei o le agaga lena i lau Afioga i le Minisita o le Siosiomaga, ia malo faafetai lea ua faafofoga mai le matou itumalo ua faaleo atu. E pei o manaoga lava na...e leai a nisi manaoga o Fagalao na o taligalu lava ma auala. Ioe...

**Afioga Hon Toeolesulusulu Cedric Pose Salesa Schuster (Minisita mo Punaoa Faalenatura ma le Siosiomaga):** Lau Afioga i le Fofoga Fetalai...

**FOFOGA FETALAI:** Malie oe le sui usufono mamalu se i tuu atu le avanoa i le Minisita o Siosiomaga.

**Afioga Hon Toeolesulusulu Cedric Pose Salesa Schuster:** Faafetai i lau Afioga i le Fofoga Fetalai faafetai foi i le sui usufono o le Vaa o Fonoti e tusa ai o le lagaina o le mataupu. Ou te iloa e tau tutusa lava maua ma le Afioga i le Minisita o Galuega. Ai se ma aiga pizza lea na saunoa ai le... Ae pei ona faaali foi i le aso ananafi ma nisi o tatou sui ae le gata foi lea o nisi o tatou itumalo o lo o faagasolo fuafuaga o le asiasiga ma tapenaga a le tatou Matagaluega, e fua mo tatou priority areas. Ia, e ese le vaega e... o le vaega o aseta a le tatou Malo o lo o i ai auala. O seawalls la e i autafa e puipui ai auala ma aseta a le Malo, o le vaega tonu lea o lo o i lalo o le vaega a le tatou LTA ae o lo o galulue faatasi ma le Matagaluega o le Siosiomaga... ia ona e moni le saunoaga a le sui usufono o le Vaa o Fonoti e i ai isi vaega o le auala a o isi vaega o le itumalo e le o i ai tulaga ia o nisi o aiga aemaise foi o afioaga ma alavai.

Atonu e aoga foi lena taimi i lau Afioga le Fofoga Fetalai e avatu ai foi se tuualalo... ia ona o le tulaga lea o solo e moni e i ai foi se tasi o sui usufono sa faapea ona faaalia aafiaga. Ia e avatu ai foi le tuualalo ma le talosaga a le tatou Matagaluega ona o nei vaega aemaise lava o solo i le auala lea a tatou lea e sau i le Mafa e alu i lalo i Taelefaga. Silasila foi i ai o le tele o ia vaega ua ta laau ae fai ai tatou totogaava. Ia o loo faataoto le polokalame a le tatou Malo o lo o i ai le toe totoina o ia laau. O le taua o le toe totoina o ia laau ina ia mafai foi

ona i ai le palapala e taofia ia vaega ina ia faaititia ai le solo o le alu i luma. Faafetai i lau Afioga i le Fofoga Fetalai.

**Afioga Fuaava Suluimalo Amataga (Aleipata Itupa i Luga):** Lau Afioga mo se avanoa faamolemole.

**FOFOGA FETALAI:** Ia mo le faasaoina o le taimi o le sui usufono mamalu. Ia, se i tulai mai le sui usufono mo Aleipata Itupa i luga.

**Afioga Fuaava Suluimalo Amataga:** Faafetai i lau Afioga mo le avanoa. E leai o le tulaga e tau faafesili atu ai i lou uso a sui usufono o lo o saunoa ona o lo o taua e faapea e tolu lava solo ia sa faapea ona taumafai i ai le Pulega a le LTA e faaleleia. Ia, pei o le faafesili po o solo ia i le agai i Fagaloa po o le vaega foi lea i le Mafa lea o lo o i ai le solo tele i tafatafa o le platform foi lea o le lookout lea e i luga le mafa? E pei o le tulaga lena aua o le sui usufono foi ia e tutusa lelei lava lona sa ma le taavale foi o faaogaina e i ai faletapoleni foi lele, ae se i silasila ane pe le aafia atu ai ma tauuluulufau foi ia e masaesae ai fale tapoleni ona e tautau mai lalo. E tele foi nai fai pasi ua complain ai ua leaga foi lele ae le i... Ae faafetai i le Afioga i le Minisita, ua aoga foi le afio atu i le tatalaga o le slipway lea e i le uafu, e maliu mai le aso lea i le aso Tofi ae Aso Faraile loa faatoa vaaia lea o se konekarate moavao ua amata faamama mai tafaala i le Mafa. A o le mea sa i ai, ua mageso lava aao foi o le atunuu ona ua lala mai i totonu vao... ua tele ona solia e taavale ona o tulaga ia. Ae ua aoga le afio atu o le Minisita ia atonu ai ua i ai se faatonuga e agai atu konekarate lea se i taumafai le ala e agai atu i tua ia matou e aafia atu ai ma Fagaloa aua o pioga uma ia e i lalo mai le afega i Fagaloa o lo o i ai tauuluulufau ia e tele ona aafia ai fale o taavale aemaise lava pasi ona e le mafai ona alo i le isi itu ona o lo o agai mai taavale mai le isi itu. Ia ma le agaga faaaloalo faafetai.

**FOFOGA FETALAI:** Ia se i tulai mai lau afioga i le sui usufono mamalu e faaauau le saunoaga.

**Tofa MAUU SIAOSI PUEPUEMAI:** E faaleo le agaga faafetai i le Afioga i le Minisita o le Siosiomaga o lea ua manino leaga o le tausaga talu ai sa aumai ai le tusi a le Faatonu Sili ma le Ofisa, o lea ua matua apoapo lava ma talia ma le agaga fiafia, na toe tusi mai ma le pito i lalo, “Mauu aua e te popole o lea o le a faasaga atu ma agai atu le Matagaluega e ave le faamuamua e moni ma faamaoni.”

Lau Afioga i le Fofoga Fetalai, ona oo mai lea i le Matagaluega o Leoleo. E talanoa i le tulaga lea ua i ai le tatou siosiomaga aemaise o le tupulaga talavou. Se i toe silasila lava pe le o i ai se isi faiga o lea ua aumai ai e i latou nei po o nisi o le aufaipisinisi se isi faiga e aumai ai i tulaga foi ia... E fausia ai le aisa i inei po o le drugs... e ese mai le mea lea e galulue ai i vaa ma tulaga faapena. O le uiga o lau tala, sa ma talanoa anapo ma se tasi o au uo Afelika ona ou fai lea i ai o au ou te lauga nei. Fai mai lana fesoasoani, “Mauu, faaleo i le tou Palemene o le tulaga lea ua i ai le atunuu...” Ia, ou te faamalulu lava i e o lo o

faia le galuega lea o le faletalavai. Ou te faamalulu i ai ne i te i ua satia so latou finagalo i sou vaivai ma sou faatauva. Ae ou te talitonu, ailoga o latou faia. Ae pei o se itu lena e tau momoli atu i lau Afioga le Minisita o Leoleo ma le tou galuega fai. Pe le o i lea e maua ai le isi auala. E i ai le upu foi lea e faapea e pei o se tala faafagogo o le penitolo. O le penitolo ina ua ou ola mai ita ia e paepae. O le penitolo lea ua sau i le taimi nei ua fa lanu. O le isi lanu ua meamata ae paepae le isi pito. A o le isi penitolo ua paepae le isi pito mumu... Se i silasila ifo lava lau Afioga i le Minisita ma le Matagaluega pe le o le isi lea vaega lea e saofaga mai ai totonu vaega ia lea e gaosi ai le tulaga lea. Ia e pei lava ona fai atu e le tusi se lima... O au foi ua loa ona ou faipisinisi ou te musu foi e tuuaina au i se mea. Ou te faamalulu foi... afai foi o faafogafoga mai latou o lo o faia... Leai e le faapea ua ou tauleagaina a outou galuega. Ae o se manatu e faatupu manatu i le tatou Malo aemaise foi o lenei Maota. Ioe, aua o le puipuiga lea ua i ai nei ua ese le tulaga ua i ai. Leaga o tatou, e puipui ma faamamalu tulafono aua tupulaga lalovaoa. Leaga e fesili taeao po o le a le galuega sa faia i le aso nei. E pei o le agaga lena e toe faamanatu ai i lau Afioga i le Minisita se i toe silasila ane lava lau Matagaluega poo ai foi Matagaluega o lea se i toe silasila totoa atu lava... Na o lou toe faapupula atu lava... O le penitolo lava na ou vaai au ia a o ou laititi o lea ua 53 lou matua... e tasi lava le lanu e paepae. Ae o lea ua tatou vaai i penitolo lea ua i ai nei... ia pe le o le tasi lena auala... Ia ae... tau na matou fatufatu atu... sui le ula e faaula ai la outou galuega ina ia sasala ma manogi atu aua le tapuaiga a Samoa leaga o le... tulaga pito i sili lea ona ogaoga lea ua tulai mai. Ou te le tau atua le mea sa ou i ai ai, na ou vaai i le tupulaga talavou, ae le o le kolisi ae o aoga i lalo mai lea ua aafia i le tulaga lea. Ona o le mea ua i ai... ia o le tau lava ia o le faaeteetega o le soifua ma le ola o le mamalu ole atunuu aemaise o le alofa i alo ma fanau.

Ia, o nai motugaafa ia a lenei itumalo ae o le Tala o le Tupe, lau Afioga i le Minisita aemaise foi o le Faauluuluga ma le Matagaluega faamalo le tapena. E le faigofie foi la outou galuega aemaise a tilotilo atu i lea taimi na faamaopoopo mai ai lenei Tala o le Tupe, ia, viia le Alii. Malo lava le galulue ma le alolofa ia Samoa. Aua o galuega uma nei e fai e le o faia mo outou. E le o faia mo lo outou mamalu ae fai mo Samoa atoa, leaga o la e tapuaia aua foi lo outou valaauina e tusa ai foi ma outou faiva. Ia, agalelei le Atua i lau Afioga le Fofoga Fetalai. Ia maua foi le tofa paia ma le faapalepale e lava onosai ai foi i nisi foi o taimi e siisii ai le tatou Maota. E faapena lava o suaga lava o le vaatele, e sua atu sua mai, ia e saili lava penina ia aua Samoa ma le manuia.

Ia maua foi le soifua laulelei i lau Afioga i le Tamaitai Palemia aua tiute ma faiva, lau Afioga i le Sui Palemia, Aiga o Minisita, Sui Minisita, lau Afioga foi i le Taitai o le Itu Agai ma le Sui Taitai, sui usufono mamalu o le Palemene. Ia agalelei le Atua faamanuia a tatou galuega tau amata o lenei foi tausaga. Ia folau i manu, soifua ma ola foi le itumalo o Fagaloa ma lona sui usufono. Ia o la matou lauga lea. Ia manuia lenei aso.

**FOFOGA FETALAI:** Ia, malo saunoa i lau Afioga le sui usufono mamalu mai le Vaa o Fonoti. Ia lea ua foi ua maua nisi foi o... aua le itumalo ma le agai i luma. Lea ua foi tali manino Afioga i Minisita, ia tatou onosai ma tatalo pea i

le Atua e fesoasoani mai i le faasoa aua le atinaeina o tatou itumalo. Ua faamalo faafetai mo le saunoaga.

Ia o lea e matau atu ua leai se tasi o sui usufono e fia saunoa i le tatou Tala o le Tupe, ou te iloa o le avanoa lenei mo lau afioga i le Taitai o le Itu Agai o lea e i ai nai minute, ia ma faaauau ai foi pe a tatou foi mai i le tatou malologa. Ia lau afioga i le Taitai o le Itu Agai.

**Susuga Hon TUILAEPA FATIALOFA AUELUA SAILELE MALIELEGAOI (Taitai o le Itu Agai):** Lau afioga i le Fofoga Fetalai, ia faapea foi le tatou Maota nei, ou te tulai atu ma le ava tele e momoli atu le faamalo i lau afioga i le taitaiga o le tatou fonotaga. E faamalo foi i le tatou talosaga na e siitia i lenei taeao. O upu lava a le Tusi i fetalaiga a le tatou Alii, pe toalua pe toatolu e potopoto ma tautau Lona Suafa, ia e faapena foi ona lotolotoi ai. O lo o afio le tatou Atua i le mea nei ma musumusuina i tatou i manatu aua le faatinoina o tatou tofi e faapei ona tatou tauto ai i le Atua Faamalo foi i le tauatai i le tele o le matou tutulai atu ae na o lau afioga lava e faitoatasi lau galuega. A uiga lava ia o le tatou atunuu e tetele i Pesega ae matua lava i le oō.

Ou te faamalo foi i lau Afioaga i le Tamaitai Palemia lau afioga Fiamē Naomi, lau afioga i le Sui Palemia faapea le Peresetene o lena foi Vaega Faaupufai ma Minisita o le Kapeneta. Faamalo le onosai.

E momoli atu foi le faamalo i sui usufono o le tatou Palemene i lena itu toatele ia faapea foi ma lenei itu toaitiiti, faamalo le galulue. E momoli foi le faamalo ia te outou o Ofisa Sili o Pulega o Matagaluega. O le atoa ai lenei o le 40 tausaga talu ona taoto le faaiuga a le Kapeneta i le 1984, ina ia auai outou o Ofisa Sili o Pulega o Matagaluega a o faagasolo le Fonousu a le atunuu, ae tasi lava le mafuaaga, a i ai se mataupu e manatu le CEO e tatau ona vave fautua mai ai le Palemia ma Minisita, aua le tuua le fautua. A o la outou galuega foi lea o le faamaumau. E leai se isi taimi o lea ua feiloai Taitai o Samoa e tatau ai ona outou faamaumau mataupu uma sa laga i totonu i fingingalo faaalua o sui usufono o le atunuu. O outou o lima taumatau o le Malo e tou te foi atu i le Ofisa ma faapena ona outou faufautua ai i le Malo i mea ia sa laga e sui usufono o le Maota lenei; e faamanatu atu.

O le itu taua o la outou galuega, e tatau ona outou auai i fonotaga a Komiti a le Palemene. E tatau lava ona auai Ofisa Sili o Pulega. Aisea? Leaga o le Ofisa Sili o Pulega o ia tonu lea e na te ave le fautua i le Minisita. E seasea ona fesili le Minisita i le numera 2 po o le numera 3, o le numera 1 e fesili i ai le Minisita. Afai foi e moomia e le Kapeneta se fautuaga mai le Ofisa Sili o Pulega o le Matagaluega, o le Ofisa Sili o Pulega o le Matagaluega e saofai i totonu o le Kapeneta ma ave le fautuaga i le Kapeneta. O le ala lena e taua tele ai pe a valaau atu Komiti a le Palemene e taofi outou tuatuagia mo Ofisa Sili o Pulega ae auai ina ia aumai Lipoti i totonu o le Palemene lenei ua atoatoa.

Ou te avatu foi le faamalo i le tapuaiga a Samoa. E muamua i le tapuaiga leleoa a Le Ao Mamalu o le tatou Malo faapea foi le Sui Tofia i le latou faafogafoga mai ma taputapu mai o tatou faiva. E faapena foi ona faamalo i le tapuaiga a le tatou atunuu, aua Aiga ma latou Tama ia faapea foi Tumua ma Pule, Itua ma

Alataua, Aiga i le Tai ma le Vaa o Fonoti, ae matua lava le tu'u i auauna a le Atua ma le latou faanonogamanu e tatalo lava i taimi uma i le Atua e na te tulu'i mai mafaufauga lelei ia i tatou e faaaoga ai o tatou tagata tatou te tautua 100% mo le tatou atunuu.

E i ai upu taua lava e faamanatu mai, e te le auauna i ni Atua se lua. E te auauna loa i Atua e lua ona e alofa loa lea i le isi ae le amanaia le isi. E loloto upu na mo tatou uma lava i totonu o le Palemene lenei; aemaise foi Ofisa Sili o Pulega o Matagaluega ia ave le latou faataua ina ia aua ne i faaletonu se fautuaga e aumai i le Kapeneta i le Palemia ma outou o Minisita. Aua a faaletonu le fautua, e afaina uma tatou le tatou atunuu atoa.

E faapena foi ona oooo se upu i lau afioga i le Fofoga Fetalai, i le tapuaiga a tatou uso a Malo i le la itu o le vai i le latou tapuai mai le Faigamalo a Tutuila ma le Motu Sa. Ia, o upu tomua na o lenei taeao ae i ai le fautuaga taua lava sa saunoa i ai le sui usufono o Samatau ma Falelatai, fai mai lana faamanatu ia i tatou, o tatou uma lava o auauna a le atunuu lenei o Samoa, e tatou te tautua i lo tatou atunuu ia manuia le tatou atunuu. Ou te manatu e tatau foi ona amata la'u tautalaga ae faamalo lava i le faamanatu a le Sui Taitai o lenei Vaega le afioga ia Lauofo na faai'u ai ana upu i le aso ananafi i le tatou Maota, faitau le Lipoti a le Komiti o Tupe o le taua ia o le Lipoti lena. Ou te le i faalogo atu lava o laga mai e se isi tuualalo a le Komiti o Tupe na o le Sui Taitai o lenei Vaega. A o le taua ia o mataupu o lo o laga mai totonu o le Lipoti lena.

O le isi fesili sa aumai ananafi ma e taua tele ia te a'u, o le fesiligia o itula sa galulue ai. O i la ou te faataua ai le tulaga lea. Ona pau lava lea o le Komiti a le Palemene ua faatonuina e le Palemene, ia 14 aso tou te galulue ai i le Tala o le Tupe ona foi mai loa lea e fono le Palemene, e 14 aso.

A o a taimi ia e pau i ai le 14 aso? O taimi o malologa o le kerisimasi ma le tausaga fou. A oo foi i le ono masina o le taimi foi o la e faamamalu le tatou Tutoatasi, ae pau lava lea o le Komiti a le Palemene e faatonu e le Palemene lenei e 14 aso tou te galulue ai e sailiili le Tala o le Tupe ma aumai fautuaga i totonu o le Palemene lenei. O le mea lena e faamalulu atu ai ia te outou o Ofisa Sili o Pulega o Matagaluega i le valaau atu o le Komiti lenei tou te omai, ae ua malaga isi i a latou mafutaga i fafo, fai mafutaga a isi i totonu o le atunuu.

Ia, matou te faamalulu atu ai ia te outou e le o ni aga a le Komiti a o aga a le Palemene lenei, le Palemene lenei, na faatonuina le Komiti lea aua lava tou te o tou te tafafao ma fai ni a outou aso malolo a ia outou omai e galulue i le po ma le ao...

**FOFOGA FETALAI:** Ua ou vaelupeina le saunoaga a lau Afioga i le Taitai o le Itu Agai, malo lava mo le faaso. Ae talu ai o lea ua tatou oo mai i le tatou taimi malolo ma o le malologa o le taeao. O le mea lea toe faaauau le saunoaga pe a toe taliu mai i le tatou malologa.

*Na faataatiaese Taulumaga a le Fono Aoao Faitulafono mo lana malologa masani i le itula e 10:32 i le taeao ma toe faaauau i le itula e 11:04 i le taeao.*

**FOFOGA FETALAI:** Ou te faasilasila atu ua toe amatalia nei Tualumaga a le Fono Aoaofaitulafono. Faafetai i le Atua i Lana foai lea ua tali le sua i le paia o le Palemene, ua maua foi se faasiligamalosi e faaauau ai a tatou galuega. Malo le onosai. E faataatiaese tatou Tualumaga mo le malologa o le taeao, o lo o saunoa le Afioga i le Taitai o le Itu Agai. Ou te tapa lau Afioga e faaauau le saunoaga.

**Susuga Hon TUILAEPA FATIALOFA AUELUA SAILELE MALIELEGAOI:** Ia, ua saoi le vaivevela a le tatou Maota nei na tapena e lau Afioga i le Fofoga Fetalai ma lau Matagaluega. Faamalo le agalelei mai i le tau saiiiliga o se malosia aua le tatou galuega. Ae ou te le i me'i ese i i galuega faa-Komiti, ua ou manatu ai aso la. A matou omai mai Matagaluega e tali mea sa valaau atu ai a o matou galulue o auauna a le Malo, aemaise lava le Matagaluega lea o le Tupe, ou te sau o lo o i ai falalili o toeaia na momoe ai le po atoa, ia e faapefea ona toe o i Savaii toeaia. E momoe ai i le po atoa i le taumafaiga o latou lipoti, ne i te i ua faasala e le Palemene le Komiti lava lea o Tupe.

O le mea la lea, a o auai le toatele o tatou i le tele o mau saofai a o la e galulue lava le Komiti. Na o le tasi lava le aso na ou alu ese ai ou faanoi, toetiiti lava faasala au e le Komiti, na ou alu ai leaga ua suamalie le mea lea o le saofai i taimi faapea, ona ou manatu foi lea se i ou alu tasi ou te tofo i le suamalie, o le saofai a lo'u uso i le Puletiu. Na ou alu lava i le aso lea e faamamalu aua ana ou le alu, oi, e masalo foi e fai au. Ona ou alu loa lea ua ou faamamalu i lo'u uso ua fiafia ma kisikisi. Ia ae faafetai lava alii mo le lafo. Ae o le tulaga la lena e taua tele ai o la e tou te momoe ma outou taitoalua a o la e galulue le Komiti. E taua foi mo le Matagaluega...

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** Lau Afioga i le Fofoga Fetalai...

**FOFOGA FETALAI:** Malie lau Afioga i le sui usufono, se i tuu atu le avanoa lea i le faanofotupu foi a le Afioga i le Minisita o Faatoaga ma Faiga Faiva.

**Susuga Hon Laauli Leuatea Polataivao Fosi:** Ioe, o faiga faavae lava, a saunoa loa le Taitai o le Malo po o le Taitai o le Itu Agai, e leai lava se isi e toe faalavelave. Ae ua ou manatu e i ai nai mea laiti e tatau ona faamalamalama ma faamanino ina ia faasao, i te i foi ua toe fafa mai se isi tuuaiga ia te au.

O le mea muamua lau Afioga, e le o a'u o se Peresetene o lena Vaega Faaupufai, o a'u o le Taitaifono o le Vaega Faaupufai. O le mea lona lua ou te faamaonia e le tasi le saofai na afio ai le Taitai o le Itu Agai e tele. E tasi la le saofai lea na ma feiloai ai tua i le faafotutupu foi i le Suafa Puletiu i Lepa ae le o a'u na saofai, o lo'u atalii na saofai. Ia na oo atu lea i le tulaga masani leaga o lana lea matafaioi lea e tatau ona fai i tapaa o Lepa o le afio atu e faapaia le nofo ma fai le nofo.

Ma le mea mulimuli ma te le i feakisi, o le mea lena e tatau ona faamalamalama, na ma faatalofa. Sa ave i ai lau faaeaea masani. Leaga e ese

lava le polokiki e uma i inei, ae a tatou o loa i tua, o aiga, o sootaga, toto e faavavau. Na ou manao leaga o lea ua tilotilo uma le fia afe o tagata na i ai i lena aso, po o a foliga o lea ou te alaala atu i le tala o lo'u aiga o a'u o le Sa'o o le Aiga, ae o lea ua afio atu le Afioga i le Tulauniu o Atua e faapaia nofo. O le a la le silasila a le Itumalo? E leai lava se mea na gase, ioe, po o a futia ua sola ma aso ua alu i ana saunoaga mamafa e fai ia te au, ae a ma feiloai e tumu i le faaaloalo.

O le faamatalaga lena ma le manatu o le tulaga lena e faamanino ne i te i ua taitaiseseina ai le tatou Maota.

**FOFOGA FETALAI:** Leaga o lea ua... tulai mai lau Afioga i le Tamaitai Palemia.

**Afioga Hon Fiamē Naomi Mataafa (Palemia):** Ia se i faasao le taimi o le saunoaga a le Taitai o le Itu Agai. Ou te tautala i saofai a le la aiga ma le Minisita, ae ou te fia tautala i le vaega lea pei ua foliga ua see ese mai ai o aso galue o le Komiti o Tupe ma le faaaliga e faapea e na o le pau lea o le Komiti e faatonuina i le galue i totonu o le 14 aso. E pei o le 14 aso lau Afioga o le fua pito ititi lea, ae a avanoa isi aso ua tele foi isi aso avanoa e faatino ai le galuega a le Komiti. Ae mo faamaumauga a le Maota ina te i ua i ai se faitau ua vaapiapi le taimi ua tuuina atu i le galuega a le Taitaifono ma le tatou Komiti, e 19 aso pe a tatou faitau i le aso na faataatia ai le Tala o le Tupe Faaopopo o le aso 19. O le vaiaso lena 19 e oo i le aso 22 o Tesema. Ona fai loa lea o le malologa a le Malo faatoa toe ae mai lea i le aso 8 Ianuari 2024. Mai le aso 8 e oo mai le aso 23 o le Fono, e 19 aso. E tau ina ou faamanino le itu lea, e leai, e vaai alofa foi i le Afioga i le Taitaifono ma sui usufono o le tatou Komiti ae le o se tulaga fou foi lea, e tele lava ina faataatia tatou tupe faaopopo i le vaitau lea o le tausaga. O se matou faamalamalamaga lea ma le faaaloalo.

**FOFOFA FETALAI:** Malo saunoa i lau Afioga i le Tamaitai Palemia po o le Taitai foi o le Maota mo le faamalamalamaina o lea tulaga. Ia lau Afioga i le Taitai o le Itu Agaio lea ua...

**Susuga Hon TUILAEPA FATIALOFA AUUEUA SAILELE MALIELEGAOI:** Lau Afioga sa ou faamama atu a o lea la ua toe faaopopo mai isi aso ua atili ai le mamafa o le galuega. E le afaina ae leai foi sau tala e toe avatu i lou uso. Ae o le tulaga i lau Afioga o le faataua o le fono a le Komiti o Tupe. Ou te fautuaina foi ma le agaga faafetai ia outou o Ofisa Sili o Pulega e auai mai e lagolago le Kapeneta i galuega o lo o faatino i totonu o le Maota lena, e i ai le tau lelei. O le tau lelei. Ua ou manatua aso la a o ou Minisita o Leoleo, ia, soo, sau soo lava Papalii nofo mai i ina le a la le mea lea ua i ai? La e ua nofo mai i i ae nofo atu au i lalo i i. O le itu lelei lena e alu alu a te i ua outou omai foi outou tou te nonofo i i ae ua outou malamalama.

Lau Afioga i le Fofoga Fetalai o lena ua avatu le finagalo sui usufono ua uma ona saunoa o lena itu e lagolago le Tala Faaopopo o le Tupe ma ua manino

foi, o lenei mea o le Tala Faaopoopo e na o se tupe faaopoopo e faamaea ai galuega moomia mo le tausaga o lo o faagasolo.

Lau Afioga i le Minisita o Tupe, o ou mama na, o lenei ua manino le avatuina foi o le lagolago i le tatou Tala Faaopoopo o le Tupe. Ua uma ona saunoa nisi foi o le Vaega lenei ae ou te toe fia faaopoopo lava i le tulaga. O lau faafetai ona o lea ua i ai se lagona e toe tilotilo e aumai se tatou vaalele. O uiga lava ia o le soifuaga o lo o tatou i ai, e i ai lava taimi e fesuisui ai faaiuga fai, ae o le matou lagolago uma lenei ua avatu i le tulaga o le taumafaiga o lo o alo i ai le Kapeneta pe afai ua faatino se faatalanoaga. Sa fesoasoani mai foi le IFC, le World Bank i le faatalanoaina o le isi foi tatou joint venture ma le Virgin Airline. Afai ua toe tapa le faletupe o le lalolagi o i latou lenei ua i ai le tomai e lagolago mai i le tatou Malo. Ae faamalo mo le taulagalaga mo mea lelei.

Lau Afioga i le Fofoga Fetalai, ua uma ona saunoa nisi foi o le Itu lenei i le tulaga lea o le taumafai e taofiofi mea nei o fualaa faasaina. O lea ou te maitau o se mataupu o lo o faatauaina uma lava e tatou uma i totonu o le Maota lenei. Ma ou te faafetai faapitoa lava i leoleo i le latou taumafaiga o lo o fai nei ae i ai nisi taumafaiga e sili atu, tai pei la o masini ia ua matou faalogo atu i ai e taua tele le tulaga lenei i le matou faalogo. E i ai le itu lenei na ona ou faamanatu lau Afioga i le Fofoga Fetalai, o le mea lava lea na sau ai tatou mai le amataga e tatou te talatalanoa ma tapa le fesoasoani a alii ma faipule, lea foi ou te manatua pea nisi o Itumalo e iloa loa se atalii ua tagofia mea ia, e omai lava matai o le Itumalo e momoli mai. O le tuualalo lenei sa tatou sau ai, e le lava a tatou tupe faatupe ai le tele o le manaoina ia tatou faataitai i atunuu i fafo e tele a latou... e faafaigaluega tagata i totonu o le Matagaluega o Leoleo. A o tatou ia o matai uma o le nuu o isi na leoleo e tatou te faaaogaina. Ae ou te matua fautuaina le tulaga lenei e tapa le fesoasoani a alii ma faipule i le tauaveina o le tatou galuega o lo o taumafai nei.

E i ai le itu lenei ua tupu tele le sau o taavale i totonu, a o lea foi sa avatu e nisi le kiu o taavale i le taeao. E taua tele le aafia o leoleo i le faatonutonuina o le traffic i le taeao ma le taimi foi e uma ai galuega. E taua tele le itu lenei leaga o moli latou e i ai le taimi e alu alu lava ona mumu lava lea o le isi itu a o la e alu lava latou. E taua tele ai la le faaopoopo atu o leoleo i le taimi tonu lea e moomia ai tatou tagata faigaluega e omai i galuega faapea foi ma le toe taliu atu i fale.

O lau fautuaga i le tatou vaega lea o galuega. Masalo e tataua ona amata loa ona faataoto ni tatou plans mo nisi auuala fou e tau lessen ai le traffical gestion lea o lo o ua i ai nei. O mea ia e masani ona tilotilo i ai i latou o Inisinia, e le tau faatonua e le Malo. A o le isi tulaga lenei e tulai mai, e tele mataupu e amatamea atu ai le Kapeneta ona o le tulaga lenei, o le tele o tatou nuu e omai sao lava i sui usufono. E ao ina le o i le Matagaluega e fitoitonu i ai mataupu ae omai i a latou sui usufono ma latou Pulenuu.

Sa tatou talanoa i le tulaga o le faaoga o mea nei o le malosia mai le la ia faapea foi ma le vai. E i ai le manatu...

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Malie lau Afioga i le Taitai o le Itu Agai se i tuu atu le avanoa i le afioga i le Minisita o Galuega Tetele.

**Tofa Hon Olo Fiti Afoa Vaai:** Ou te faamalulu atu i le Afioga i le Taitai o le Itu Agai ua... o lea foi la ua saunoa i le tulaga lea o le aafiaga foi ua i ai le tatou atunuu i le tele o taavale ae ua utiuti foi tatou auala. O lea lava e faagasolo i le atu Vaimauga le auala foi lea sa i ai le plan a le tatou faigamalo, toetiiti maea faatalanoaga foi ma aiga o lo o faalavelave i lea foi atinae.

O i i le itu i Sisifo ua uma ona taoto i totonu o le Sector Plan a le Transport le tulaga tonu lava lea ua saunoa mai ai lau Afioga ma e le o toe mamao foi. Masalo pe oo atu i le masina fou ua faamaea le feasibility study o le auala lea e agai mai gauta i Vaitoloa. Peitai o la ua toe i ai le fesuiaiga ona o le lava o eleele i ina i Vaitoloa, la ua toe taumafai atu Inisinia e toe faataoto mai se ata i i Vailoa Faleata. Ae faafetai foi o lea e lagolagoina e lau Afioga le tulaga lea ma le faaaloalo, faafetai.

**FOFOGA FETALAI:** Malo faafetai i lau Afioga i le Minisita, ia lau Afioga i le Taitai o le Itu Agai lea ua toe maua lou avanoa.

Toe lua minute o lau saunoaga.

**Susuga Hon TUILAEPA FATIALOFA AUELUA SAILELE MALIELEGAOI:** O le tulaga lea ou te fia laga, o talanoaga ia sa fai e faatatau i le tuuina i lalo o le tau o le eletise. O lou la malamalamaaga lea e i ai nei ua taugofie le tatou eletise ona o le malosia lea mai le la faapea foi ma matagi lea e i ai le tatou masini e tasi la e i Aleipata. Ia e faapea foi ma le eletise e maua mai le suavai.

O lou la talitonuga e toe afa lea e totoe o le eletise moomia, e tatou te moomia ai le faaulufale mai o le kamupani latou te gaosia le paleni lea e totoe. Na ona faataatia atu faapena e le taumatea o galulue i ai outou o lo o nafa ma le tulaga lea aemaise aso nei i le timu, ua faigata ona toe maua se eletise mai le la. A o le taimi la lenei ua tataua ona faagaioi mai le eletise maua mai le suavai ia faapea foi ma le matagi.

**Tofa Hon Olo Fiti Afoa Vaai:** Lau Afioga...

**FOFOGA FETALAI:** Ia malie lau Afioga i le Taitai o le Itu Agai, sei tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai:** Faafetai tele i lau Afioga i le Fofoga Fetalai, faafetai atu foi i le Afioga i le Taitai o le Itu Agai. O lea faatoa uma ona taoto nisi o fuafuaga a le tatou Malo i le vaega tonu lea ua saunoa i ai le Afioga i le Taitai o le Itu Agai. Ma e i ai le faamoemoe, ona o le tele foi o nisi o kamupani ua talosaga mai i le faiga lea o le gaosiga o le eletise i le la. E i ai le talitonuga lau Afioga i le Fofoga Fetalai e oo atu ia Iulai ua amata ona faatino le vaega lea se i faauma i le faaiuga o le tausaga fou.

O le taimi nei o lo o faapena, e le o afa le pasene pei ona tatou tuliloaina ona o le tulaga tonu lava lea e i ai le taimi o timuga e i ai foi le taimi o le la ma ou te talitonu lava po o se mea o le 30%. O lea lava e fealualuai faapea ona e le o lava tatou kamupani e mafai ai ona gaosi le eletise. Ae faafetai lau Afioga i le Taitai o le Itu Agai, ia o lea o le a tatou amata nei ia Iulai ma le faamoemoe e oo atu ia Iulai po o Aukuso o le tausaga fou ua tau maea le vaega lea ina ia tatou maua le 80% i le 90%. Ma le faaaloalo.

**FOFOGA FETALAI:** Malo faafetai.

**Susuga Hon TUILAEPA FATIALOFA AUUEA SAILELE MALIELEGAOI:** Faamalo. Lau Afioga i le Fofoga Fetalai o le Matagaluega lea o le Falemai, masalo o faafitauli taua lea e faafeagai pea ma le atunuu o le short o tatou vailaau ma Fualaaui, a o la e i ai auala e tatau ai ona faatino, e tele le tatou fale na fau e teu ai fualaaui nei ma vailaau.

O si au la fautuaga i le afioga i le Minisita e manaia pe a fai ma alu e asiasi ma tilotilo i ai ia lava tatou fualaaui. E oo foi la i le tulaga i le Pulega e silasila pea i le mea lea o le conflict of interest. O le vaivaiga tele lava lena o lea e maitau atu i le itu lena. O le conflict of interest at the top position in the Ministry, e tilotilo pea i ai.

O le tulaga i le... e i ai le faafitauli tele lava lea se i tilotilo pea i ai lau Afioga i le Minisita o Faatoaga, e le o lava tatou vailaau e faaasu ai ia nisi oloa e ave i fafo. O lo o i ai nei isi mea e fia lau i fafo ua ova ma le tolu masina o taaitia pea i nei, e le talia e le Malo o Niu Sila ona o le tulaga e le lava le malosi o tatou vailaau o i ai e faaasu ai oloa nei.

Lau Afioga i le Fofoga Fetalai, i le tulaga o le internet e fai lava si tele o le mataupu lena. O le tausaga e 1995 na usuia ai le fonu a Minisita o le vaega lena o le Pasefika i mea tau femalagaaiga. Sa address ai le fonu lena e le tagata e igoa ia Jeff ma ia faamatala ai ia i matou uma sa i ai ua talu ona malepe le faa-Komunisi i Rusia, o lea la ua tatala mai e le Malo o Amerika se auupega. Se auupega taua i le lalolagi e faaoga e le lalolagi mo latou fefaatauaiga ia faapea foi ma isi ituaiga services e improve ai le IT (Information Technology). E tau mai e le tagata lea o Jeff faatoa 30,000 tagata ua latou faaogaina, o lona uiga e le i taitai le lalolagi. O lea na fai ai le tatou iuga o le a tatou liliu loa e faaleleia le tatou Information Technology i le tulaga o le faaogaina o le internet.

O faafitauli tetele lava na i ai i le taimi lena ona e tatau ona tuueseese ia le Telecommunication mai le Postal, o lea la na fai ai le tatou Tulafono i le tausaga e 1999 e mafai ai ona tuueseese loa le Telecommunication ma amata ai loa ona faaoga e tatou le internet. Sa faatu ai foi i ina ma le tatou domain name. O le domain name lena, o le "ws". Pau lea o le auala ua faaoga e le lalolagi e faigofie ai ona e telefoni atu i se tagata i so o se itu lava o le lalolagi. A o le i faia le mea lea, o telefoni mo Samoa sa i ai toetiti maua le 30 o fuainumera. Ae na aveese loa le faiga lea ae faaoga le domain name o le "ws" ia na ona e vili lava maua loa ma le tagata e te fia talanoa i ai, po o fea lava le itu o le lalolagi. O lea la na tatou galulue loa i ai e faatino le internet.

Lau Afioga i le Fofoga Fetalai, o le taua o le itu lea leaga o i tonu lea na fasiotia ai la'u Minisita, o la'u Minisita sa feagai ma le EPC ona na te le i iloa o lea e i ai se pisinisi fai faaalatua a le Minisita sa i ai muamua. Ina ua ou aveesea le Minisita lea, o i ina na tupu a'e ai ma se manatu ia te ia e faamuta le ola o Luagalau.

Lau Afioga i le Fofoga Fetalai o le taua ia o le mea lenei...

**FOFOGA FETALAI:** Ia malo, faafetai.

**Susuga Hon TUILAEPA FATIALOFA AUJELUA SAILELE MALIELEGAOI:** E leaga na tagatavaleina ai le Minisita.

**FOFOGA FETALAI:** Ae na ona ou vaelupe atu le saunoaga a lau Afioga...

**Susuga Hon TUILAEPA FATIALOFA AUJELUA SAILELE MALIELEGAOI:** Na ala ai ona ou aveatua le mataupu lea...

**FOFOGA FETALAI:** Ia, o lea ua maea lou taimi... ae saunoa mai faamaea mai lou taimi.

**Susuga Hon TUILAEPA FATIALOFA AUJELUA SAILELE MALIELEGAOI:** E ala ona taua le tulaga lea ona o i tonu lea na taugofie ai loa ma omai loa kamupani nei mai fafo. E tolu tatou kamupani na i ai, o le Telecom New Zealand, o le Digicel faapea foi ma le Samoatel, lea la na faatu ai le tolu lea. E le i umi ae toe faa-expand ma toe fai fesuiaiga lea la e i ai nei le Vodafone faapena foi ma le Digicel.

Lau Afioga o le a faamuta ai i i lau tautalaga...

**Afioga Hon Toelupe Maoiautele Poumulinuku Onesemo (Minisita mo Fesootaiga ma Faamatalaga Tekonolosi):** Lau Afioga i le Fofoga Fetalai pe maua se avanoa.

**FOFOGA FETALAI:** Ia faafetai.

**Susuga Hon TUILAEPA FATIALOFA AUJELUA SAILELE MALIELEGAOI:** Ae o le taua ia o le mea lea ona o i lea e pisa ai tatou i le mea lea o le mataupu lea o le internet.

**FOFOGA FETALAI:** Malie se i tulai mai le Afioga i le Minisita o Fesootaiga pe i ai se fesootaiga ma le... aua o lea ua faauma mai le saunoaga a le Afioga i le Taitai o le Itu Agai lau Afioga i le Minisita.

**Afioga Hon Toelupe Maoiautele Poumulinuku Onesemo:** Ia faafetai lau Afioga i le Fofoga Fetalai. E tulai foi ma le ava ma le faaeteete e talifuaitau. E le o se talifuaitau lau Afioga, na o se mea e fia faasao ma se lagona o lea e tau fia malamalama po o le a le sootaga o le internet ma le tagatavaleina o le Afioga

i le Minisita. Leaga ou te manatua lau Afioga le saunoaga a le Afioga i le Taitai i taimi foi ia o omai Ofisa Sili o Matagaluega e faalogologo i fono nei lau Afioga. O le tausaga 2016 sa taofia ai e si o matou itu i sasae le auala, saunoa le Afioga i le Taitai o le Itu Agai i totonu o le Maota lenei a o i gauta i le ogaoga o fana a Leoleo, lagona lota fefe. I le Minisita la o Fesootaiga lea ua talanoa ae fesootai i le tagatavaleina, e lagona lou fefe, o le tala moni lena. O le mea lea lau Afioga lea sa taulagalaga atu ananafi ona o saunoaga na lea e tau fesiligia ai po o le a le fesootaiga ma le agaga faaaloalo.

**Susuga Maulolo Tavita Aмоса (Sagaga 2):** Lau Afioga i le Fofoga Fetalai pe i ai se avanoa faamolemole.

**FOFOGA FETALAI:** Ia ua tau le maua lelei atu e le Nofoa le faauilavea a lau Afioga i le Minisita, ae se i tulai mai... O fea e agai i ai lau faauilavea...

**Susuga Maulolo Tavita Aмоса:** Na o si tatalo ona o le sui usufono lea e aafia i i lea sa fai ma sui usufono o le Itumalo lenei. E i ai foi le agaga e puipui ai i tulaga o mea faapea, o mea ua tuanai a o le feavatai ma le va fealoaloi, ailoga e i ai se tonu lelei ma se manuia o Samoa e maua ai pe a tali lea fesili ma suesuega? Faasola ia ia mea faamolemole. O le tatalo atu lea. Ua manaia le tatou fono o lea foi o le a uma. Faafetai.

**FOFOGA FETALAI:** Se i tulai mai lau Afioga i le Minisita.

**Afioga Hon Toelupe Maoiautele Poumulinuku Onesemo:** Lau Afioga i le Fofoga Fetalai, faamolemole....

**FOFOGA FETALAI:** Sei tulai mai lau Afioga i le Minisita.

**Afioga Hon Toelupe Maoiautele Poumulinuku Onesemo:** E pei ona ou taumafai atu, e lagona lou fefe leaga na ou savali i le vanu o le ata o le oti. O le agaga lena. O le amataga o le tatou fono i lenei vaiaso, a silasila lelei i ai i le aoga o le tekonoosi, sa ou toe matamata i le fono. O le fono na amata e le Afioga i le Taitai o le Itu Agai e sese uma mea ia e fai mai ai le Minisita lea. A ou toe tomanatu i ai, o lea e discredit lo'u tagata, discredit lou tagata i mea nei. A tuu la i ai, o lea ua ta nofo... sa sili ona ota faamavae ae tate le i amata ona ota ola. Ma le agaga faaaloalo.

**Susuga Hon TUILAEPА FATIALOFA AUЕLUА SAILELE MALIELEGAOI:** Lau Afioga i le Fofoga Fetalai, a fia faamavae faamavae. E leai, ua ala ona ou usitai atu i lau faatonuga a o lea o le a ou faasalalau maia i le Aso Sa. O la e maua i totonu o le tusi a a'u, le Palemia, alu e faitau nanei.

**FOFOGA FETALAI:** Ia manatua foi e le sili atu nisi faasalalauga i lau saunoaga i totonu o le Maota. O le mea lea ua i ai le manatu o le Nofoa o le a

faataatia ai faapea lea tulaga o le mataupu e pei ona laga. E manatu foi ma manumanu i le tatou taimi ma le faagasologa o le tatou galuega.

O le mea lea faafetai i lau Afioga i le Taitai o le Itu Agai, o lea ua faaalua foi nisi o fautuaga mo le tatou Malo aua lava le agai i le lumanai ma nisi foi o fautuaga aua foi Ofisa Sili o Pulega o tatou Matagaluega aemaise foi o Faalapotopotoga a le Malo mo le agai i luma. Faafetai mo le saunoaga.

Lau Afioga i le Taitaifono o lea ua oo atu le avanoa i lau Afioga.

**Afioga FALEOMAVAEGA TITIMAEA TAFUA (Taitaifono, Komiti o Tupe Maua ma Tupe Totogi, Aleipata Itupa i Lalo):** Lau Afioga i le Fofoga Fetalai, faafetai mo lo matou avanoa. E tu atu ma le ava tele e fai ai au ma sui o le Komiti o Tupe Maua ma Tupe Totogi.

Ee ia i lagitapu le paia le oia o le Maota o Samoa ua maea ona tapui e tootoo taia, taalolo ia. E faafeiloai atu i lau Afioga i le Fofoga Fetalai, malo le soifua laulelei viia le Atua, e pei ona e faatamamua e taia le ao o maugaloa ma faafetaia Lona alofa laveai o lenei ua tatou fesilafai i magafetausoifua. Malo faafetai.

E faatalofa atu i lau Afioga i le Tamaitai Palemia, lau Afioga Fiamē Noami Mataafa. Malo le onosai malo le lavapapale. Faafetai le faataumatagi aua le tautua matavela. Le mamalu o le Kapeneta malo le lagolago tali, faifaimalie o outou faiva o le mamafa o galuega o lo o i o outou aao.

Afifio Minisita Lagolago, afio le Taitai o le Itu Agai ma le Sui Taitai ma le mamalu o sui usufono uma o le tatou Palemene o Samoa. Faafetai ua gase i le vao mala ma puapuga ae ua tatou folau i le lagimatafi aua le faaauauina o la tatou tautua tauave ia Samoa ma ona upufai. E faamanuia atu le tausaga vaeatu o outou sa ma faiga. Malo galulue fita aua le tautuaina foisia ia Samoa ma lona Malo tauatia'e.

Faafetai mo le tapuaiga a Taitai o Ekalesia i so o se fatafaitaulaga ua ae ai ma le manuia faiva i lena tausaga ua tuanai. E manatu foi o lea ua faagasolo galuega o lenei tausaga fou. Ae le masalomia le ae ma manu faiva o lau Palemene ona o la outou tapuaiga ma le nofo tatalo malo le fai o le faiva.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti. E faataumatau atu i lau Afioga i le Fofoga Fetalai se i taumafai atu e fuatia le tao aua se sao o Aleipata Fale i Lalo i le taeao feiloai o le Maota Fono o Samoa.

Lau Afioga i le Fofoga Fetalai, e i ai le talitonuga o lena ua folasia i le Laulau a le Fono Aoaō Faitulafono le Lipoti a le Komiti o Tupe Maua ma Tupe Totogi e faatatau i le taunuuga o ana sailiiliga sa feagai ai i luga o le Tala Faatatau Faaopopo Muamua o le Tupe mo le tausaga faaletupe o lo o faagasolo nei 2023/2024.

Lau Afioga i le Fofoga Fetalai o le Tala Faatatau Faaopopo Muamua o le Tupe 2023/2024, e maitauina le toe faatupulaia o le tamaoaiga talu mai le aafiaga o le Koviti-19 i le tolu tausaga faaletupe ua tuanai.

Na faamauina le toe faatupulaia o le tamaoaiga o le atunuu ina ua toe tatala tuaoi o femalagaiga faava-o-Malo i le tele o tagata tafafao maimoa mai fafo e asiasi mai i Samoa.

Lau Afioga i le Fofoga Fetalai, i lenei Tala Faaopoopo Muamua o le Tupe 2023/2024 e fitu Matagaluega a le Malo o lo o aofia ai. E mafai foi ona ausia nisi o Matagaluega ma Faalapotopotoga a le Malo o lo o maua fesoasoani tuusao mai paaga mo le faatinoina o latou poloketi o atinae i lenei tausaga faaletupe.

Lau Afioga i le Fofoga Fetalai, o le a auiliili atu ia vaegatupe taitasi o lo o aofia i lenei Tala Faaopoopo Muamua o Tupe 2023/2024 o lo o faamauiina le vaegatupe e \$24 miliona i tupe alu faaletulafono. E \$24.3 miliona mo totogi o nonogatupe mai fafo mo poloketi a le Faalapotopotoga o le malosi tau eletise ma le \$538,071 mo le fetuunaiga o matafaioi a le Kapeneta ma le faaopopoina o Minisita fou e toalua faapea alauni mo Komiti faa-Palemene.

O vaegatupe eseese o lo o aofia i lenei Tala Faatatau Faaopoopo Muamua o Tupe 2023/2024, e aofia ai le \$2.7 miliona tupe alu faaopoopo faatatauina mo Matagaluega e ono a le Malo, ma le \$920,621ua faaitiitia ai tupe sa faatatauina i le Tala Faatatau Autu o le Tupe.

E \$42.5 miliona tupe maua faaopoopo faatatauina i le 2023/2024.

E \$1 miliona tupe faamealofa mai paaga mo poloketi o atinae faatino i nisi o Matagaluega ma Faalapotopotoga a le Malo i le 2023/2024.

O le aotelega o lenei Tala Faatatau Faaopoopo Muamua o le Tupe o lo o fuafua e siitia ai le faasiliga o tupe alu i tupe maua i le 3.4% o le tamaoaiga, mai le 3.3% e pei ona i ai le Tala Faatatau Autu o le Tupe 2023/2024.

Lau Afioga i le Fofoga Fetalai ou te fiafia e faailoa atu e tusa ai ma iloiloga a le Komiti i luga o lenei tala faapopo muamua o tupe . O loo sologa lelei pea le faatinoina o galuega o faiga faavae uma tau tupe, e pei ona fuafuaina i lenei tausaga faaletupe ma o lo o faamauiina foi le tulaga lelei o tupe a le Malo e atagia ai le mataitu lelei e le Matagaluega o Tupe faatasi ai ma ana paaga o vaega tumaoti o tupe, ina ia lava tapena le malo e tali atu ai i ni tulaga e ona lamatia le toe tau atiaeina o le tatou tamaoaiga.

Lau Afioga i le Fofoga Fetalai, se i ou tali atu lava i nai vaega ia e pei ona tuu mai fesili a sui usufono mamalu.

E tasi lava le fesili na tuuina mai i le Lipoti a lenei Komiti. O lona uiga foi e na o le tasi foi le fesili e tali, na o le tali o le fesili a le Afioga i le Sui Taitai o le Itu Agai. Faamalo atu i lau Afioga i le Sui Taitai le amanaia o le Lipoti. O lona ua uma ona tuuina atu e le Taitai o le tou itu vaega e pei ona e fesiligia i le tulaga o itula na faaaogaina i le matou fonotaga.

O le tali i le vaega e pei ona e taua i le 90%, o lona, ua toe tatala fetuunaiga o vaegatupe mo Matagaluega a le Malo mo galuega faatino i le ono masina o totoe o le tausaga faaletupe ona o nisi o vaega na tuu ai se faamalosi ia i latou o lo o vaai tupe a Matagaluega taitasi, ina ia fuafua tatau le faaaogaina o latou seleni.

Lau Afioga i le Fofoga Fetalai, e fia faaleoina le agaga faafetai i sui usufono o lenei Komiti, le Afioga i le Sui Taitaifono le Afioga i le Taitai o le Itu Agai ma sui usufono mamalu uma o le Komiti o Tupe Maua ma Tupe Totogi mo la outou lagolagosua ma le faatauina o lo tatou valaauina. E fia momoli atu foi le faafetai...

**Afioga Sulamanaia Fetaiai Tauiili Tuivasa:** Lau Afioga i le Fofoga Fetalai ona o lea e maitau atu o le a momoli le faafetai a le Taitaifono....

**FOFOGA FETALAI:** Malie lau Afioga i le Taitaifono se i tuu atu le avanoa i le sui o Vaimauga 1.

**Afioga Sulamanaia Fetaiai Tauiili Tuivasa:** Ioe leaga o lea ua maua e na o le tasi lava le fesili, a o Vaimauga sa muamua lava lauga ma faailoa le ositaulaga i tulaga lea sa tatalo ai le Vaimauga ae a pe a taatia nisi tofiga ia i Minisita Lagolago tatou te ositaulaga ai. Ia lea e le i tali mai le sui usufono i le tulaga lena i le tele o mea o lo o manaomia ai e si o tatou Malo, ia lea toe lima masina uma lenei Paeaiga ae aumai ai totogi... E lagolagoina e le Itumalo lenei totogi o Minisita, a o Minisita Lagolago lea sa aumai totonu o lau Lipoti, ia o le ala lena lea sa agaga atu ai ina ia...

**FOFOGA FETALAI:** Ia lea ua maua atu le saunoaga a le sui usufono. Se i tulai mai lau Afioga i le Tamaitai Palemia.

**Afioga Hon Fiamē Naomi Mataafa:** Lau Afioga i le Fofoga Fetalai o le mataupu lea na laga mai e le sui usufono o le Vaimauga, ou te manatu o le mataupu faale-faiga faavae. O la ua silasila le Taitaifono ma le Komiti o Tupe i le faaagaaga o tupe ae o lea ou te sauni atu ou te tali lelei atu i le sui usufono, aua o le mataupu lea tau Pulega. O le tali lea ma le faaaloalo.

**FOFOGA FETALAI:** O lea ua faafofoga mai lau Afioga i le sui usufono mamalu, o le mataupu tonu lava lena e taatia i le Afioga i le Palemia ma le Kapeneta. Se i tulai mai lau Afioga i le Taitaifono e faaauau le saunoaga.

**Afioga FALEOMAVEGA TITIMAEA TAFUA:** Malo faafetai, faafetai atu i le sui usufono mai Vaimauga. O lena ua tuuina atu le faamaninoga o le tulaga e pei ona e fesiligia. Sa leai lava foi se manatu e te toe tulai mai, aua o lea o le a pei o le a tau aliali ai lou le fiafia i nai sui usufono ia na fai nei le latou faiga palota, ae le afaina. Malo faafetai, faafetai lava le tapuai.

**Afioga Sulamanaia Fetaiai Tauiili Tuivasa:** Lau Afioga i le Fofoga Fetalai, leai, e le o le agaga lena. E pau lava le upu sa manao ai le sui usufono o Vaimauga o le ositaulaga. Sa tatau la ona e tali mai e faamalamalama mai le uiga o le ositaulaga lea sa tatalo ai le... e leai se palapala o le manatu o Vaimauga i sui usufono ia. Leaga o le agaga lena e tatau ona faasao lau Afioga e le Fofoga Fetalai...

**FOFOGA FETALAI:** Ua i ai le manatu o le Nofoa o lea ua saunoa le Palemia, taatia ai faapea le mataupu lea o lea ua saunoa le Palemia. Malie lau Afioga i le Taitaifono aua ne i toe afea le tulaga lea o lea ua saunoa le Palemia.

**Afioga FALEOMAVEGA TITIMAEA TAFUA:** Malo faafetai, faafetai lava. O le tulaga e pei ona e saunoa, pau lava lou malamalama i le ositaulaga e ave i faafeaiga tatou te faaaloalo iai i le gagana e ave i faafeaiga o le au ositaulaga ae malo faafetai.

Lau Afioga i le Fofoga Fetalai, e fia faaleoina le agaga faafetai tele i sui usufono o lenei Komiti le Afioga i le Sui Taitaifono, le Afioga i le Taitai o le Itu Agai ma sui usufono mamalu uma o lenei Komiti o Tupe Maua ma Tupe Totogi mo la outou galuega lagolagosua ma le faatauaina o lo outou valaauina.

E fia momoli atu foi le faafetai tele i Matagaluega uma a le Malo sa auai ma tuuina mai le lagolago i le lauliliuina o lenei galuega taua.

Lau Afioga i le Fofoga Fetalai, se i ou liliu ane i lou Itumalo o Aleipata le Fale i Lalo, i le Afio le Tuiatua Faanofonofu le Tofa i le Matua, Afifio Alaalaimalae, afio le Alii o le Itu ma le Tane o le Itu, Pule na Tatai i Lalovi ma Malaefono ma upu ia te oe Saleaamua. I le nofo a faafeaiga ma outou faletua i Ekalesia taitasi o lo tatou Itumalo, faafetai tatalo, malo le tapuai ua iu manuia faiva o la outou auauna.

O nai manaoga o si ou Itumalo, se i ou oo ane lava i nai vaega ia, e fua lava le manaoga i le vaega o le Tala o le Tupe. E leai ni manaoga tele o lenei Itumalo, na ona faamalo atu i vaega e pei ona taua mea ua uma ona i ai le fuafuaga a le Afioga i le Minisita ma le Matagaluega o le MNRE i le tulaga i tatou taligalu o lo o faapena ona lavea ai le tele o afioaga o lenei Itumalo i le faatinoina o a latou poloketi.

O le tulaga i lau Afioga i le Minisita o Galuega, e leai ni manaoga fou o lenei Itumalo. O le tatalo lava ia, se i silasila ane a maua ni galuega se lua e faatino, e pei o galuega tuua ua lava lea mo lenei itumalo. Lau Afioga e faamamafa pea le auala laupapa lea i Vaipu e manaomia lava faamolemole ni a tatou signs ma ni reflectors e tau faailoa ai aua e fai a... aua a oo nei ina pouliuli e tau le iloa le auala lea. Na o le pau lena o nai vaega e manaomia. E pei lava ona ou taua e fua lava le manaoga i vaegatupe o lo o tuuina mai.

Lau afioga i le Fofoga Fetalai ou te fia faaleoina foi le agaga faafetai i le Failautusi ma le Ofisa o le Fono Aoao Faitulafono. E le faagaloina foi Failautusi o le matou Komiti mo galuega fita. E le o ia matou ni manu, na pau lava o lea ia faaogaina le soifua tautua mo se manuia o le tatou Malo, ia faamanuia le Atua i Taitai o le Malo ma le Kapeneta, afifio i Minisita Lagolago le afioga i le Taitai o le Itu Agai ma le mamalu o sui usufono uma o le Palemene ae sili ona maua le malosi e lau afioga i le Fofoga Fetalai ae matou ola i le alofa ma le agalelei o le Atua. Soifua ma ia manuia.

**FOFOGA FETALAI:** Ua faamalo saunoa i lau afioga i le Taitaifono o le tatou Komiti o Tupe, a o lea foi ua faafofoga le Maota aemaise foi o nisi o mea sa laga e sui usufono. Faamalo faafetai o lea ua maua ma ua faamalamalama foi le tele o itu na faaalua. O le mea lea malo le galulue faafetai i la outou Komiti mo le galuega.

Ia o lea e maitau atu o lo o i ai nai minute ae lafo atu pea i lau Afioga i le Tamaitai Palemia.

**Afioga Hon FIAME NAOMI MATAAFA:** Lau Afioga i le Fofoga Fetalai ma le mamalu o le Palemene, o lea ua taoto le saunoaga a le Taitaifono o le Komiti o Tupe a le Palemene e tusa ai ma le Lipoti ua taatia i le Laulau-a-Fono. Faamalo faafetai mo le galuega. E ui lava e pei e faafoliga mai e le tele ni fesili agai le tou Lipoti, ae ou te manatu o mataupu sa laga i finagalo o sui usufono o lo o i ai lava i totonu o le lio o Matagaluega ma Atinae eseese o lo o i ai i le tatou Tala o le Tupe.

Ae lau afioga i le Fofoga Fetalai i le faagasologa o le tatou galuega, e i ai se manatu o lea ua latalata i le tatou taimi malolo, ae taatia ia i le vaiaso fou le tali atu a le tatou Malo aemaise foi o le tulai mai o le afioga i le Minisita o Tupe e tusa ai ma lana Tala o le Tupe Faaopopo o lo o tatou talanoaina nei. E i ai se manatu lau afioga i le Fofoga Fetalai a matau mai e taumafai lava e faaitiita faauilavea a le tatou Kapeneta seivagana lava ni mea e tatau ona faasao e tusa ai ma tatou Tulafono Tumau, ina ia sologa lelei le faalogo aemaise foi le momoli mai o finagalo o itumalo. O lea foi la sa fai le tala a le Kapeneta o lea sa i ai avanoa o Minisita e tali atu ai i nisi o mataupu sa laga aepeitai e ao pea ona maua se avanoa e saunoa ai Minisita e tusa ai ma ni mataupu o lo o i totonu o le tatou Tala Faaopopo o le Tupe e faamanino ma faamalamalama atili nisi o mataupu.

Ou te manatu e le o se mea umi ae atonu foi e taua, e fai foi o le saunoa mai o le Maota ae ia manino foi le talifuaitau atu a le tatou Malo. O lea e i ai le faamoemoe e amata atu le tali a le Malo i le itu lenei faagasolo atu i le itu lea ona faaiu lea e le afioga i le Minisita o Tupe le matou pitolaau o le tatou galuega i le vaiaso fou, pe a finagalo i ai lau afioga. Ma le faaaloalo.

**FOFOGA FETALAI:** Faafetai. Ua faamalo le saunoa i lau afioga i le Taitai o le Malo lau afioga i le Tamaitai Palemia aemaise foi o le avanoa mo le tali foi a le tatou Malo i nisi foi o mataupu na laga e sui usufono mamalu o le Palemene. Faafetai o lea ua faataatia mai le faagasologa o le tali a le tatou Malo ma o lea foi ua aumai lou finagalo ona o lea ua lata i le tatou taimi malolo.

Ua i ai foi le manatu o le Fofoga Fetalai ia e lelei foi ona sailiili malosi le tatou Maota aua foi le faaiuga o le vaiaso, aemaise foi le tatou faagasolo atu i nisi o tatou galuega aua foi le vaiaso fou. Ae malo faafetai mo le saunoaga pau o le a faapena ona fai pe a tatou aulia le vaiaso fou. Ia e le toe tau faailoaina le paia o le Maota nei i le tulaga o le faagasologa o le tatou galuega i Aso Faraile taitasi.

O lea ua tatou taunuu mai i le taimi manava o le Aso Faraile o le itula e 12:00. Faamalo le onosai i le tatou Maota, malo lava le onosai i le taumafaiga o le tatou galuega, e le faaitiita le agaga faafetai i a outou afioga sa sausaunoa i lenei vaiaso. E tatou te molimauina lava le tele o mataupu taua sa laga aemaise o fautuaga e fesoasoani ai i le pitolaau a le tatou Malo, o le a ea se mea ua lelei ona tatou fai, ia fai lea ma viiga o le Atua. Malo le usufono i lenei aso.

Ia tatou talosia ia i le alofa o le Atua i lenei vaiaso fou ia momoli atu i ai le soifua o le Palemene ma toe faaauau ai le tatou galuega. Faafetai Samoa i lau tapuaiga i ou tulaga faalupelupeina ua tau i le manuia le alofaiva o lau Palemene i lenei vaiaso ona o lau tatalo. Ua faamalo faafetai. O a ni saunoaga a lau

Palemene ua le tautamalii i lau faafofoga tapuai mai ia alofa ma faamagalo, a o le tatalo ia tumau pea le alofa ma le agalelei o le Atua i si o tatou atunuu.

E faafetai atu i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, o outou lava e tua atu i ai le Malo ma le Palemene. Faafetai mo le auaunaga i lenei vaiaso faamanuia tele le Atua i lo outou valaauina.

E le galo foi se faafetai i auaunaga uma o lo o galulue i aso uma e fono ai le Palemene, o le Matagaluega o Leoleo, le Matagaluega o Fesootaiga ma Faamatalaga Tekonolosi, le Pulega o le Tinei Mu ma Faalavelave Tutupu Faafuasei ma le Kamupani a le Cooline, faafetai mo le auaunaga ia faamanuia le Atua i la outou tautua Malo. Pe a o tatou tatala ia tautai le Alii i ala uma ia faamanuia le Atua i le alo atu i faigamalologa o le faaiuga o le vaiaso ae faapea Lona Sapati Paia.

Ae tatou te le i tolopo ou te talosaga atu i le sui usufono mo Aleipata Itupa-i-Luga, lau afioga i le Sa'ofetalai se i e saunia se tatou tatalo e faaiu ai le tatou fono.

***Na tolopo Taulumaga a le Fono Aoaao Faitulafono i le itula e 11:57 i le taeao seia aulia le Aso Lua, 30 Ianuari 2024 i le itula e 9:30 i le taeao.***